

LA CARTA DEL APOSTOL SAN PABLO A LOS EFESIOS

¹ Che co jae Pablo. Che co jae Jesucristo jemimondo Tumpa jei vae rupi. Aicuatía cua tupapire Efeso pe pico vae pe. Tumpa peñono tee iyupeguarã, jare piyeyocui cavi Cristo Jesús pe. ² YandeRu Tumpa jare yandeYa Jesucristo tumee peve ipiacavi jare ipiacatu.

Tumpa yanemivendise Cristo rupi

³ Yambiadora Tumpa. Jae co yandeYa Jesucristo Tu. Tumpa umee yandeve jeta mbaembae icavi vae ara pegua Espíritu Santo rupi, Cristo re yarovia ramo. ⁴ Echa'ã ndei ivi uyeyapo mbove, Tumpa yandeparavo, yande ñaï vaerã Cristo imbaerã. Cua uyapo, ñaneñono tee vaerã iyupeguarã, jare yanembujupi vaerã jae jovaque. ⁵ Tumpa yanderau. Jáeramo tenonde yave yandeparavo yayeyapo vaerã tai retarã Jesucristo rupi. Echa'ã cua iquirëi ete uyapo jae jei vae rupi. ⁶ Jare cua uyapo, yambiadora vaerã ipiacavi tuicha vae jeco pegua. Tumpa ipiacavi ete yandeve Tai uau vae rupi. ⁷ Jesucristo yanderepi ma. Echa'ã umano yanderé. Jáeramo Tumpa umbiasa yandeve yanembaeyoa reta. Echa'ã jae ipiacavi tuicha ete co. ⁸ Tumpa iyaracuaa catu jare opaete uicuaa. Jáeramo ipiacavi ete yandeve. ⁹ Tenonde yave uicuaaca'ã iquirëi uyapo vae. Èrei añave uicuaaca yandeve iquirëi uyapo vae. Cua uyapo

jae jei vae rupi. **10** Cua co Tumpa iquirēi uyapo vae: Umbatita opaete mbaembae uyeyapocue vae, Cristo oĩ vaerā iYarā - opaete mbaembae ara pe ñugüïnoi vae, jare opaete mbaembae ivi pe ñugüïnoi vae. Cua Tumpa uyapota ara iyapi yave.

11 Tenonde yave Tumpa yandeparavo ñanoi vaerā jae umeeta yandeve vae. Jae yandeparavo, yande ñaĩ vaerā Cristo imbaerā. Jare Tumpa cua uyapo iquirēi ramo. Echa'ã jae uyapo opaete mbaembae jae jei vae rupi. **12** Cua Tumpa uyapo uyembidoraca vaerā īru vae reta pe ore rupi. Echa'ã ore rani ndugüirovia Cristo re. **13** Jare pe reta vi perovia Cristo re, piyandu yave ñee añete vae. Echa'ã jocua ñee icavi vae umimbeu peve quirāi piyembiasaca vaerā. Jare perovia Cristo re yave, Tumpa umeet peve Espíritu Santo, uicuaaca vaerā pe reta jae imbae co. Echa'ã Tumpa jei umeet vaerā Espíritu Santo. **14** Tumpa umeet yan-deve Espíritu Santo, uicuaaca vaerā ñanoita opaete Tumpa umeeta yandeve vae. Cua Tumpa umeeta yandeve yanderepi ete yave. Yande co jae imbae. Jare Tumpa cua uyapo yave, uyembidoracata co cua jeco pegua.

*Pablo uyerure Tumpa pe upurugüirovia vae reta
re*

15 Jáeramo che aicuaa güive quirāi pe reta perovia yandeYa Jesús re, jare quirāi peau opaete Tumpa oñono tee iyupeguarā vae reta, **16** jecuaeñoi amee yasurupai Tumpa pe peré, jare jecuaeñoi chemandúa peré, ayerure Tumpa pe yave. **17** Tumpa tumee peve aracuua Espíritu Santo rupi, jare tuicuaaca peve mbaembae,

picuaa cavi vaerã Tumpa regua. Tumpa co jae yandeYa Jesucristo uicuaaca yandeve vae. Jae co yandeRu uyembia doraca vae. ¹⁸ Tumpa tumee peve aracuaa, picuaa vaerã quirãi pepuere peãro piyero via reve. Echa'ã jae preparavo cuarã. Tumpa tuicuaaca vi peve quirãi uyembia doraca eteta opaete vae pe umeeta yandeve vae jeco pegua. Echa'ã jae ñaneñono tee iyupeguarã. ¹⁹ Tumpa tuicuaaca vi peve quirãi tuicha ete imbaepuere yanembori vaerã. Echa'ã yande yarovala Cristo re. Tumpa uicuaaca ma tuicha ete co cua imbaepuere. ²⁰ Echa'ã cua imbaepuere rupi Tumpa umbijecove ye Cristo güeru umanocue vae reta ipite güi, jare umee chupe uguapi vaerã iyacata coti ara pe. ²¹ Cristo imbaepuere tuicha ete opaete mburuvicha reta ara pegua jare ivi pegua jare ipotave mbaepuere güinoi vae imbaepuere güi. Cristo imbaepuere tuicha ete opaete cua ara reta pe mbaepuere güinoita vae reta imbaepuere güi. ²² Echa'ã Tumpa umee Cristo pe ico vaerã opaete vae iYarã. Umee vi chupe ico vaerã upurugüirovia vae reta iYarã. ²³ Echa'ã upurugüirovia vae reta Cristo jete co. Jäeramo upurugüirovia vae reta jare Cristo pentiño co. Jare Tumpa umee opaete mbaembae Cristo pe.

2

Tumpa yanembiasa ipiacavi jeco pegua

¹ Jare Tumpa umee ma peve tecove ipiau vae. Echa'ã tenonde yave penoi'ã tecove ipiau vae

pereco icavi mbae vae jare pambaeyoa reta jeco pegua. ² Jare jocua jeco pegua jecuaeño piyapose icavi mbae vae upurugüirovia mbae vae reta jeco rami. Echa'ã jucuarãi uipota piyapo vaerã jocua mburuvicha icavi mbae vae yandepuere mbae yaecha vae - jae co jocua aña guasu upurugüirovia mbae vae reta ipia pe uparavíqui oĩ vae. Jucuarãi uparavíqui, agüiye vaerã jae reta uyapo Tumpa jei vae. ³ Tenonde yave opaete yande vi yaico yande yae vae reño jae reta rami. Echa'ã yaicose yanderete jare yandepiayemingueta uipota vae re. Jáeramo Tumpa uiporaracata tẽi yandeve, opaete ūru vae reta pe uiporaracata rami. Echa'ã yande vi iví pegua reta co jae reta rami. ⁴ Êrei Tumpa yandeparareco ete, jare yanderau ete. ⁵ Jáeramo umee yandeve tecove opa mbae vae yaico vaerã Cristo ndive, yepe tẽi tenonde yave ñanoi'ã tecove opa mbae vae yanembaeeyoa reta jeco pegua. Tumpa yanembiasa ipiacavi jeco pegua. ⁶ Tumpa umbijecove ye Cristo Jesús güeru umanocue vae reta ipite güi. Jae ramíño vi umee yandeve tecove opa mbae vae Cristo Jesús ndive, jare yandeaapo pentiño Cristo Jesús ndive. ⁷ Cua uyapo, uicuaaca vaerã ara reta outa vae pe quirãi tuicha ete co ipiacavi. Cua ipiacavi uicuaaca ma yandeve Cristo Jesús rupi. ⁸ Echa'ã Tumpa yanembiasa ipiacavi jeco pegua, yapurugüirovia ramo. Yande yamingana'ã etei yembiasa. Jae co Tumpa umeeiño yandeve vae. ⁹ Mbaeti quía ipuere umingana yembiasa ipotave mbaravíqui rupi, agüiye vaerã quía ipuere jei: "Cheparavíqui rupi co amingana yembiasa." ¹⁰ Echa'ã Tumpa

yandeapo. Jare yandeapo ma penti ramiño Cristo Jesús ndive, yande yayapo vaerā icavi vae. Echa'ã tenonde yave Tumpa iquirēi jecuaeñō yayapo vaerā icavi vae.

Cristo yanembipiacatu Tumpa ndive

¹¹ Jáeramo pemandúa cua re: Pe reta co jae judío mbae vae reta. Jare jocua uñemicircuncidaca jee vae reta - jae reta uñemicircuncidaca co jete pe - jae reta pembijee uñemicircuncidaca mbae vae reta. ¹² Jáeramo jocua ara reta pe Cristo mbae'ã co peve. Echa'ã pe reta Israel pegua reta'ã co, jare Tumpa jei umeeta Israel pegua reta pe vae pembaerā'ã co. Jáeramo peāro'ã mbae piyerovia reve. Echa'ã picose cua ivi pe Tumpa picuaa mbae reve. ¹³ Tenonde yave pe reta mbirí pico Tumpa güi. Ërei añave piyeyapo penti ramiño Cristo Jesús ndive, jare coiño ma co pico Tumpa güi Cristo imano jeco pegua. ¹⁴ Echa'ã Cristo co jae mbiacatu umee yandeve vae. Jae uyapo penti ramiño judío reta jare judío mbae vae reta. Tenonde yave judío reta jare judío mbae vae reta oyovaicho uyupii. Uyembiyao reta uyugüi. Ërei Cristo umbai ma yembiyao. ¹⁵ Echa'ã Cristo umano yave, umbai mboroyocui. Echa'ã mboroyocui umimbeu judío reta pe mbae uyapo vaerā. Jáeramo Cristo umbai mboroyocui, uyapo vaerā mocui reve penti ramiño jae ndive. Jucuarāi umee mbiacatu. ¹⁶ Jare cua uyapo, umbipiacatu vaerā Tumpa ndive mocui reve penti ramiño imano jeco pegua. Echa'ã imano jeco pegua oyovaicho'ã ma uyupii.

¹⁷ Jayave ou umimbeu mbiacatu regua pe reta tenonde yave mbiri pico chugüi vae pe jare ore tenonde yave coiño nduico chugüi vae pe. ¹⁸ Echa'ã Cristo rupi mocui reve yandepuere yaya yandeRu re Espíritu Santo rupi. Echa'ã Espíritu Santo pentiño co. ¹⁹ Jáeramo pe reta ambie ivi pegua reta rami'ã ma co. Pe reta co jae uñeñono tee Tumpa peguarã vae reta jentaigua reta. Pe reta co jae Tumpa jentarã reta. ²⁰ Yamijaanga penti tenta. Temimondo reta jare Tumpa iñee umimbeu vae reta tenta iguapicarã oñono vae reta rami co, jare pe reta co jae tenta rami. Jesucristo etei co jae ita uñeñono tenonde tentarã vae rami. ²¹ Opaete tenta uyeyapocavi oĩ ita uñeñono tenonde tentarã vae ndive, jare uyeyapo oĩ penti tenta uñeñono tee yandeYa peguarã vae. ²² Pe reta vi penti ramiño co yandeYa ndive. Jáeramo pe reta vi co jocua tenta rami. Echa'ã Tumpa ico jocua tenta pe Espíritu Santo rupi.

3

Tumpa uicuaaca Pablo pe tenonde yave uyecuaa mbae vae

¹ Jáeramo che etei ayerure Tumpa pe peré. Che co jae penti pereso pereco pegua, Cristo Jesús pe ayeyocui ramo - pe reta co jae judío mbae vae reta. ² Picuua ma co aipo quiräi Tumpa uicuaaca cheve ñee Tumpa ipiacavi regua, che aicuaaca-yuapi ye vaerã peve. Cuaräi ayeyocui aĩ Tumpa pe. ³ Picuua ma co aipo quiräi jae etei uicuaaca cheve jocua tenonde yave uyecuaa mbae vae. Echa'ã cua regua aicuatía ma peve mboví ñee

peño. ⁴ Peminguela yave, picuua cavita co quirāi che aicuaa jocua Cristo regua tenonde yave uyecuaa mbae vae. ⁵ Tenonde yave cua uyecuaa'ã etei ñivi pegua reta pe. Ñrei añave Tumpa uicuaaca temimondo oñono tee iyupeguarā vae reta pe jare iñee umimbeu vae reta pe. Jae uicuaaca chupe reta Espíritu Santo rupi. ⁶ Jae co cua: Uyandu yave ñee icavi vae, jare güirovia yave Cristo Jesús re, judío mbae vae upurugüirovia vae reta güinoita imbaerā judío upurugüirovia vae reta ndive, jare mocui reve uyeyapota penti ramíño - penti jete rami - jare mocui reve güinoita Tumpa jei umeeta vae. ⁷ Che ayeyocui Tumpa pe. Ipiacavi jeco pegua Tumpa umee cheve jae imbaepuere rupi che amimbeu vaerā ñee icavi vae. ⁸ Yepe tēi che co jae uñeñono tee Tumpa peguarā vae reta jaicuega ete, ñrei Tumpa cua umee cheve ipiacavi jeco pegua, che amimbeu vaerā judío mbae vae reta pe quirāi yaicocatu ete co Tumpa coti, Cristo re yarovia yave. Echa'ã mbaeti quía ipuere uicuaa cua regua ipiayemingueta rupiño. ⁹ Jare Tumpa umee cheve aicuaaca vaerā opaete vae pe quirāi Tumpa umee cheve ayeyocui vaerā chupe cua tenonde yave uyecuaa mbae vae re. Echa'ã tenonde yave Tumpa uicuaaca'ã etei quía pe cua. Tumpa co jae opaete mbaembae iyapoa. ¹⁰ Cua Tumpa umee cheve, mburuvicha reta jare mbaepuere güinoi vae ara pe ñugüinoi vae reta uicuaa vaerā quirāi Tumpa iyaracuaa catu co. Cua uicuaata reta upurugüirovia vae reta rupi. ¹¹ Echa'ã cuarāi Tumpa jecuaeño iquirēi uyapo yandeYa Jesucristo rupi. ¹² Yandepuere yaya

Tumpa re Cristo rupi. Echa'ã yarovia ma Cristo re ramo, yandepuere yaya yaquïye mbae reve.
13 Jáeramo agüïye pepiatití aiporara pereco pegua vae re. Pepuere pembiadora Tumpa cua re.

Cristo ipuruau

14 Jáeramo che ayeatica yandeYa Jesucristo Tu jovai. **15** Opaete jentará ara pe ñugüïnoi vae reta jare jentará ivi pe ñugüïnoi vae reta güïnoi jee chugüi. **16** Ayerure Tumpa pe umee vaerä peve mbaepuere. Echa'ã jae imbaepuere jeco pegua uyembiadoreca ete. Jare cua mbaepuere rupi Tumpa iEspíritu tapemimiräta pepia pe. **17** Tuyecuua cavi quiräi Cristo ico pepia pe pepurugüirovia jeco pegua. Tumpa tapemimiräta jare tapemiatangätu ipuruau pe, **18** pepuere vaerä picuua cavi opaete uñeñono tee Tumpa peguarä vae reta ndive quiräi tuicha ete co Cristo ipuruau, **19** jare picuua vaerä Cristo ipuruau, yepe tēi ipuere'ã quía uicuua cavi ete opaete jocua mburuau. Pepia titinee Tumpa pe.

20 Jare añave yambiadora Tumpa. Echa'ã jae ipuere ete opaete yande yayerure chupe jese vae güi, jare opaete yandepia pe yayemingueta jese vae güi. Jeta ete uyapota yandeve imbaepuere yandepia pe uparaviqui vae rupi. **21** Tumpa tuyembiadoreca opaete vae pe upurugüirovia vae reta rupi jare Cristo Jesús rupi jaeño mai pegua. Amén.

4

Penti ramiño Espíritu Santo rupi

¹ Che co jae penti pereso, yandeYa pe ayeyocui ramo. Che pumiñera jecuaeño pico cavi vaerã, ūru vae reta uicuaa vaerã Tumpa peparavo co. ² Piñemimichi uyucotí. Agüiye pepochi piyupe. Pepiaguasu piyupe. Piyerau ramo, agüiye piñeengata piyupe. ³ Piñemiatangätu pico vaerã penti ramiño pepiacatu reve Espíritu Santo rupi. ⁴ Cristo jete pegua reta pentiño co, jare Espíritu Santo pentiño co. Jae ramiño vi Tumpa peparavo, peäro vaerã piyerovia reve penti ramiño. ⁵ Ime vi pentiño yandeYa, jare opaete yarovia yandeYa re, jare opaete yayembibautizaca Espíritu Santo pe. ⁶ Tumpa vi pentiño co. Jae co yandeRu. Jae co yandeYa. Jae uparaviqui opaete yande rupi. Jae ico yandepia pe.

⁷ Êrei Cristo umee yandeve penti penti pe ipiācavi, yandepuere vaerã yayapo mbaraviqui Cristo uipota yayapo vaerã vae. ⁸ Echa'ã Tumpa iñee pe uyecuatía oï cuarãi:

“Uyupi oo ara pe yave, güiraa pereso reta,
jare umee mbaepuere ivi pegua reta pe Tumpa
iparaviqui uyapo vaerã.”
Jucuarãi uyecuatía oï.

⁹ Tapirandu peve, ¿mbae pa uipota jei cua uyupi oo ara pe jei vae? Uipota jei ugüeyi rani vi co ivi igüi pe etei. ¹⁰ Jocua ugüeyi vae co jae uyupi oo ivate ete opaete ara reta güi vae etei. Jucuarãi uyupi, uyeyapo vaerã opaete mbaembæ iYarã. ¹¹ Jare Cristo etei umee amocue vae pe temimondo retarã yugüireco vaerã. Jare umee amocue vae pe Tumpa iñee umimbeu vaerã. Umee vi amocue vae pe umimbeu vaerã ñee icavi vae. Umee vi

ĩru vae reta pe uyandareco vaerã upurugüirovia vae reta re, jare ĩru vae reta pe omboe vaerã upurugüirovia vae reta. ¹² Cua Cristo uyapo, uñeñono tee Tumpa peguarã vae reta ipirãta vaerã ipurugüirovia re, jae reta ipuere vaerã uparavíqui Tumpa pe, Cristo jeterã uyeyapo vaerã. ¹³ Cristo uipota yayeyapo vaerã penti ramiño yandepurugüirovia rupi, yaicuaa cavi vaerã jae co Tumpa Tai. Uipota yayeyapo vaerã penti cuimbae ipirãta vae rami. Jare jucuarãi yayeyapota co, yandepia tînee oĩ Cristo pe yave. ¹⁴ Cristo uipota'ã yaico vaerã sambiai reta rami. Echa'ã sambiai reta uicuaa'ã mbae ra güirovia vaerã. Echa'ã penti ara ipuere güirovia penti moromboe, jare ĩru ara ipuere güirovia ĩru moromboe. Echa'ã moromboe añete mbae vae re oporombœe vae reta ipoqui ete co upurumbitaví vaerã. ¹⁵ Êrei yande jecuaeño yae añete vae yayerau reve. Jucuarãi yave, yaicota ucuacuaa vae reta rami, Cristo uipota rami. Echa'ã jae co upurugüirovia vae reta iñãca. ¹⁶ Cristo jare upurugüirovia vae reta penti cuimbae rami co. Echa'ã opaete cuimbae jete jare opaete iyuapiapia uparavíqui penti ramiño, icavi oĩ vaerã cuimbae. Jae ramiño vi opaete upurugüirovia vae reta uparavíqui penti ramiño uyerau reve, Cristo jeterã uyeyapocavi vaerã.

Tecove ipiau vae

¹⁷ Jáeramo che amimbeu peve yandeYa jee re cua: Agüiye ma pico upurugüirovia mbae vae reta yugüireco rami. Echa'ã jae reta yugüireco ipiayemingueta cavi mbae reve. ¹⁸ Echa'ã ipiayemingueta uñemipítumimbi ma. Güinoi'ã

tecove Tumpa umee vae. Echa'ã uicuaa'ã Tumpa regua, ipiatanta ramo. ¹⁹ Jecuaeño imbiquere, jare imara'ã etei. Echa'ã uipota ete reta uyapo vaerã opaño mbae pichii vae. ²⁰ Êrei jucuarai'ã co Cristo pemboe. ²¹ Piyandu ma co aipo chupe, jare piyemboe ma co aipo añete vae re. Echa'ã añete vae co jae Jesús. ²² Jáeramo agüiye ma pico picose rami. Peeya piyugüi pereco mai indechicue pichii vae. Echa'ã picose pe pere vae reñio, jare jucuarai piyembitavi. ²³ Tuyembipiau pepiyemingueta. ²⁴ Pipisi teco mai ipiau vae. Echa'ã teco mai ipiau vae jupi co, jare uyapoca'ã etei mbaeyoa peve. Cua teco mai ipiau vae icavi co Tumpa pe.

²⁵ Jáeramo agüiye ma peapu piyupe. Opaete pere añete vae perapicha pe. Echa'ã opaete yande penti ramiñio co.

²⁶ Pepochi yave, agüiye peyoa. Agüiye pepitu pearasreve.

²⁷ Agüiye pemaeno aña guasu re mbaepuere güinoi vaerã peré.

²⁸ Imondase vae agüiye ye ma timonda. Êrei tuyapo ipo pe mbaraviqui icavi vae, ime vaerã güinoi mbae umee vaerã iparavete vae pe.

²⁹ Agüiye pemoë ñee pichii vae. Êrei pemoë ñee icavi vae, pembori vaerã ñru vae reta. Echa'ã jucuarai Tumpa ipuere ombori uyapisaca peré vae reta. ³⁰ Jare agüiye pembipiati Tumpa iEspíritu Santo. Echa'ã Tumpa umee ma peve Espíritu Santo, uicuaaca vaerã pe reta jae imbae co. Jare Espíritu Santo icota pe reta ndive, Tumpa perepi ete regua.

³¹ Agüiye pembasi pico piyupe. Agüiye pepochi piyupe. Agüiye pearasi piyupe. Agüiye piñeengata piyupe. Agüiye pere icavi mbae vae piyupe. Agüiye piyapo icavi mbae vae piyupe. ³² Ërei pepiacavi piyupe. Piyerau. Piyembiasa uyupii. Echa'ã Tumpa pembiasa ma Cristo rupi.

5

Yaico Tumpa jei vae re

¹ Jecuaeño pico Tumpa jei vae re. Echa'ã Tumpa co jae yandeRu jare jae yanderau. ² Jáeramo pico piyerau reve, Cristo yanderau rami. Echa'ã Cristo uñemee umano vaerã, penti maemimba uyeyucacue Tumpa pe uñemee vae rami. Jare cua uyapo umbai vaerã yanembaeyoa reta. Cua umbiyerovia Tumpa, mbae ipiche cavi vae upurumbiyerovia rami.

³ Ërei agüiye etei piyapo aguasa jare opaete mbae pichii vae, jare agüiye pipota ūru vae reta imbaembae. Echa'ã Tumpa peñono tee ma iyupeguarã. ⁴ Jare agüiye vi piyemingueta imbiquere vae reta uyemingueta rami. Agüiye piyemingueta iyaracuaa mbae vae reta uyemingueta rami. Agüiye peyurupichii ñee icavi mbae vae pe. Echa'ã icavi'ã piyemingueta vaerã jucuarãi. Ërei cua mbaembae icavi mbae vae pere vaeräve pemee yasurupai Tumpa pe. ⁵ Echa'ã pe reta picuaa cua: Aguasa uyapo vae reta, jare opaete mbae pichii vae uyapo vae reta, jare ūru vae reta imbaembae uipota vae reta - echa'ã uipota ete ūru vae reta imbaembae Tumpa güi - ndarau yugüireco Cristo jare Tumpa iporoyocuia

pe. ⁶ Agüiye pemaeno quia re pembitavi vaerã cua re. Echa'ã cua icavi mbae vae jeco pegua Tumpa uiporaracata co Tumpa jei vae uyapo'ã vae reta pe. ⁷ Jäeramo agüiye pico jae reta yugüireco rami.

⁸ Echa'ã tenonde yave pe reta picose yugüireco pítumimbi pe vae reta rami. Ërei añave pico tembipe yandeYa umee peve vae pe. Jecuaeño pico yugüireco tembipe pe vae reta rami. ⁹ Echa'ã tembipe pe yugüireco vae reta ipiacavi, jare jupi vae uyapo, jare jei añete vae. ¹⁰ Jecuaeño pipota picuaa yandeYa uipota piyapo vaerã vae. ¹¹ Agüiye etei piñemíru pítumimbi pe yugüireco vae reta ndive. Echa'ã jocua uyapo reta vae icavi'ã Tumpa pe. Ërei picuaaca icavi mbae vae co jocua uyapo reta vae. ¹² Echa'ã penti ñemimaraca co yayeminguela vaerã jocua uyapo viari reta vae re. ¹³ Tembipe oï yave, opaete uyecuaa cavi, jare yandepuere yaicuaaca icavi mbae vae co opaete jocua mbaembæ. Echa'ã jocua uyapo opaete uyecuaa cavi vaerã vae tembipe co. ¹⁴ Jäeramo Tumpa jei oque vae pe cuarãi:

“Esarecoño ma.

Icove ye penti ou umanocue vae reta ipite güi vae
rami.

Cristo tumee ndeve tembipe.”

Jucuarãi jei.

¹⁵ Jäeramo piñemiatangätu pico cavi vaerã. Agüiye pico iyaracuaa mbae vae reta yugüireco rami. Pico iyaracuaa catu vae reta yugüireco rami. ¹⁶ Jecuaeño piyapo icavi vae. Echa'ã jeta vae uyapo icavi mbae vae. ¹⁷ Jäeramo agüiye pearacuaa mbae vae echa. Ërei picuaa cavi

yandeYa jei vae. ¹⁸ Jare agüiye pesavipo. Echa'ã usavipo vae reta uyapo jeta mbae icavi mbae vae. Êrei pemaeno Espíritu Santo re umitinee vaerã pepia. ¹⁹ Picuaaca quirai piyerovia ete canta reta yambiadora Tumpa pipe vae pe. Pecanta jare pembiadora yandeYa pepia pe. ²⁰ Jecuaeno pemee yasurupai opaete mbae re yandeRu Tumpa pe yandeYa Jesucristo jee re.

Yayeyocui yandiyupe

²¹ Piyeyocui piyupe, pipiu Cristo ramo.

²² Cuña reta tuyeyocui ime pe, uyeyocui yandeYa pe rami. ²³ Echa'ã cuimbae oyocui jembireco, ñaneaca oyocui yanderete rami. Jae ramiño vi Cristo co jae upurugüirovia vae reta iñaca. Jare upurugüirovia vae reta co jae Cristo jete, jare Cristo co jae upurugüirovia vae reta umbiasa vae. ²⁴ Jare upurugüirovia vae reta uyeyocui Cristo pe. Jáeramo jae ramiño vi cuña reta tuyeyocui ime pe opaete mbae re.

²⁵ Cuimbae reta tuau jembireco, Cristo uau upurugüirovia vae reta rami. Echa'ã jae uñemee umano vaerã jese reta, ²⁶ oñono tee vaerã iyupeguarã, jare oyoe vaerã. Echa'ã iñee yandeyoe, mbae yayoe i pe rami. ²⁷ Jucuarai Cristo uyapo, upurugüirovia vae reta uyembutuichaca vaerã jae jovai ñugüinoi yave. Ndarau güinoi mbae iquia vae jare mbae pichii vae. Ndarau etei güinoi cua nunga mbaembae. Echa'ã Cristo uñemee umano vaerã, upurugüirovia vae reta uñeñono tee vaerã chupeguarã, jare icavi ete ñugüinoi vaerã. ²⁸ Cuimbae reta tuau jembireco, jete uau rami. Cuimbae jare jembireco pentiño co. Jáeramo jocua

uaú jembireco vae jae co uyerau. ²⁹ Echa'ã mbaeti etei quía umitarëi jete. Opaete vae umingaru jete, jare uyandareco jese. Jae ramiño vi Cristo uyandareco upurugüirovia vae reta re. ³⁰ Echa'ã yande co jae Cristo jete pegua reta. Yande co jae Cristo isoo jare icägue pegua reta. ³¹ Cua jeco pegua penti cuimbae tusiri tu jare ichi güi, jare tuñemiru jembireco ndive, mocui reve uyeyapo vaerã penti ramiño. ³² Yandepuere'ã etei yaicuaa cavi cua regua. Ërei chemiari aï peve Cristo jare upurugüirovia vae reta re. ³³ Ërei penti penti tuau jembireco, jae uyerau rami. Jare cuña tuipiú ime.

6

¹ Cunumi reta jare cuñatai reta tuyapo tu jare ichi jei vae, yandeYa re güirovia ramo. Echa'ã cua jupi co. ² Tumpa umimbeu Moisés rupi mboroyocui reta. Jare mboroyocui itenondegua vae co cua: “Ipiú nderu jare ndesi, ³ ndico cavi vaerã, jare ndicopucu vaerã ivi pe.” Jucuarãi Tumpa jei umeeta vae.

⁴ Jare tu reta agüiye tumbiarasiño isambiai reta. Ërei tumbicuacuaa cavi. Tomboe jupi vae re, jare tumbiaracuaa, yandeYa uipota rami.

⁵ Uyeyocui vae reta tuyapo ipatrón jei vae uipiú reve jare umbutuicha reve. Ipiquirëi reve tuyeyocui ipatrón pe. Tuyeyocui chupe, Cristo pe uyeyocui rami. ⁶ Agüiye tuyeyocui cavi ipatrón pe jae umae oí jese yaveño, umbiyerovia vaeräño. Tuyeyocui chupe, Cristo pe uyeyocui ramo, jare Tumpa jei vae ipiaquirëi reve uyapo

ramo. ⁷ Tuyeyocui chupe, iquirẽi ete ramo. Tuyeyocui chupe, Cristo pe uyeyocui rami. Echa'ã cuimbæ peñõ'ã uyeyocui. ⁸ Tuicuaa cua: Ipotave vae - penti uyeyocui vae ani penti uyeyocui mbae vae - mbae icavi vae uyapo yave, yandeYa uyapota vi chupe mbae icavi vae.

⁹ Jare patrón reta tuyapo icavi vae jembiocui reta coti. Agüiye jecuaeño tuyuvanga catu. Echa'ã tuicuaa jae reta vi güinoi co iYa ara pe. Jare yandeYa ara pe oĩ vae uau'ã penti vaeño ũru vae güi.

Mbaepuere yandeYa ipuere umee yandeve vae

¹⁰ Taicue rupi ete tae peve, cherivi reta, cua: Piñemiatangätu jocua mbaepuere yandeYa ipuere umee yandeve vae re. ¹¹ Piporu opaete Tumpa ipuere umee yandeve vae, pepuere vaerã piyerepi opaete mbae icavi mbae vae aña guasu uipota uyapo peve vae güi. ¹² Echa'ã ñañeräro'ã ñaí ivi pegua reta ndive. Ñañeräro ñaí espíritu icavi mbae vae ara pe ñugüinoi vae reta ndive. Jae reta co ivi pegua pítumimbi pe yugüireco vae reta iya reta, jare mbaepuere güinoi reta oporoyocui vaerã. ¹³ Jáeramo piporu opaete Tumpa ipuere umee yandeve vae, agüiye vaerã pemaeno piyee icavi mbae vae uñeräro pe ndive vae reta pe, jare piñeräro yave, jecuaeño pepiräta vaerã. ¹⁴ Jáeramo piñemimiräta. Yamijaanga sundaro. Sundaro güinoi mbaembæ ipuere vaerã uñeräro cavi. Jae ramíño vi Tumpa umee yandeve vae yanembupuere, yandepuere vaerã ñañeräro cavi. Echa'ã pere yave añete vae, icavita peve sundaro jumbicuaa icavi sundaro pe rami. Jare piyapo

yave jupi vae, icavita peve sundaro icamisa fierro pegua icavi sundaro pe rami. ¹⁵ Jare pipota yave pemimbeu ūru vae reta pe ñee icavi vae mbiacatu regua, icavita peve sundaro ipipasa icavi sundaro pe rami. ¹⁶ Jare mburugüirovia jecuaeño penoi yave, icavita peve penti yeypiacica icavi sundaro pe rami. Echa'ã sundaro ipuere oyopia yeypiacica pe opaete ui jo vaicho reta uyapi pipe vae. Jae ramíño vi mburugüirovia jecuaeño penoi yave, ndaraui piyapo icavi mbae vae, yepe tēi aña guasu uipota ete piyapo vaerā. ¹⁷ Jare jecuaeño pemandúa yave quirái Tumpa pembiasa ma co, icavita peve áca regua fierro pegua icavi sundaro pe rami. Jare piporu yave Tumpa iñee Espíritu Santo imbaepuere rupi, icavita peve penti quisepucu icavi sundaro pe rami. ¹⁸ Jecuaeño piyerure Tumpa pe mbaembæ re. Jecuaeño piyerure Espíritu Santo rupi. Jecuaeño piñemiatangātu, agüiye vaerā pecueri. Jecuaeño piyerure Tumpa pe opaete uñeñono tee Tumpa peguarā vae reta re. ¹⁹ Piyerure ete cheré, Tumpa umee vaerā cheve chemiari vaerā aquiyé mbae reve, aicuaaca vaerā ñee icavi vae tenonde yave uyecuaa mbae vae. ²⁰ Echa'ã Tumpa chembou amimbeu vaerā cua ñee, jare cua ñee jeco pegua pereso aí. Piyerure cheré, amimbeu vaerā aquiyé mbae reve. Echa'ã jucuarāi icavi co amimbeu vaerā.

²¹ Tíquico umimbeuta peve opaete mbaembæ, picuua vaerā cheregua jare ayapo aí vae regua. Tíquico co jae yanderiví. Aau co. Jae uyeyocui cavi yandeYa pe. ²² Jáeramo amondo pepi, picuua vaerā oreregua, jare jae pembipiñacatu vaerā.

23 Cheriví reta, yandeRu Tumpa jare yandeYa Jesucristo tumee peve mbiacatu jare mburuau jare mburugüirovia. **24** Tumpa tumee ipiacavi opaete mburuau opa mbae vae yandeYa Jesucristo cotí güinoi vae reta pe. Amén.

**Nuevo Testamento Guarani Pe
New Testament in Guaraní, Western Bolivian
(BL:gnw:Guarani, Western Bolivian)**

copyright © 2012 Wycliffe Bible Translators, Inc.

Language: Guaraní, Western Bolivian

Translation by: Wycliffe Bible Translators, Inc.

Guaraní, Western Bolivian [gnw], Bolivia

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Guaraní, Western Bolivian

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

xx

2014-04-25

PDF generated using Haiola and XeLaTeX on 11 Nov 2022 from source files
dated 29 Jan 2022

09a8356f-416c-5877-91cf-40f681db481e